

UVOD

Uopšteno govoreći, inostrana finansijska pomoć zemljama u tranziciji ima izuzetnu važnost, prvenstveno u jačanju političke, ekonomske i institucionalne reforme.

U ovom radu pokušat će se prikazati „grubi“ pregled inostrane, prije svega finansijske pomoći, Bosni i Hercegovini, kao zemlji u tranziciji. Naime, obzirom na ratne okolnosti u Bosni i Hercegovini u periodu od 1992. do 1995. godine, svaka vrsta pomoći nakon ovog perioda bila je dobrodošla, prvenstveno u svrhu obnove Države, s jedne, te pomoći stanovništvu, s druge strane.

Finansijska strana pomoć Bosni i Hercegovini bila je intenzivna u periodu 1996. do 2002. godine. Nakon toga, veće učešće u pomoći Bosni i Hercegovini odražava se kroz kreditiranje, a manje u vidu donacija i pomoći sličnog karaktera. Stoga, u ovom radu bit će prikazana detaljna analiza finansijske strane pomoći u periodu 1996. do 2002. godine. U periodu nakon 2002. godine, analizirat će se najbitniji programi finansijske pomoći u Bosni i Hercegovini. Također, u skladu sa činjenicom znatno većeg učešća pomoći u vidu kredita, nego jednostranih transfera, bit će prikazani najznačajniji kreditori i iznosi po osnovu zajmova Bosni i Hercegovini.

Detaljna analiza za period 1996 – 2002. godine bit će obrađena na državnom nivou, prije svega, te na nivou entiteta Federacije BiH i Republike Srpske, uključujući i Distrikt Brčko. Zbog pada pomoći, u periodu nakon 2002. godine, analizirat će se pomoć u vidu grantova jednim dijelom, i većim obimom zajmova.

Ono što predstavlja potencijalnu prepreku ovoj analizi jeste nepotpunost informacija, i nepreglednost u smislu poređenja ovih perioda. Međutim, ovaj rad će ipak značajno doprinijeti tome da se stekne saznanje u kojem obimu i u koje svrhe je iskorištena finansijska strana pomoć Bosni i Hercegovini, bilo da je riječ o donacijama ili zajmovima. Okvirna lista glavnih aktera po oblasti intervencije koja je data u nastavku rada nije konačna.

Neophodno je navesti da je zaista evidentan veliki broj programa pomoći usmjerenih na zemlje u tranziciji. U tom kontekstu teško je i navesti sve moguće realizirane, a pogotovo planirane projekte.